

Awor Aruba tin "Fundacion Edad No Ta Conta" pa traha pa grandinan y nos hobennan



ORANJESTAD (AAN): Fundacion Edad No Ta Conta a tene un conferencia di prensa. Esaki ta un fundacion cu hendenan di edad cu ta haci diferente cos.

Nan a trece informacion na e comunidad pa splica kico exactamente nan ta haciendo. E fundacion ta consisti di hendenan 60 plus y ta traha cu hendenan di edad halto y cu hobennan den comunidad.

Mena Schwengle ta presidente di e Fundacion. A cuminsa tres aña pasa ora biblioteca a cuminsa duna un workshop na esnan cu ta of a bay cu pensioen.

Durante e workshopnan aki hendenan por a sera conoci cu diferente posibilidad cu e bashi cu nan ta cay aden como pensionado y contribui cu e comunidad den un of otro forma.

Mena Schwengle a splica

cu dos aña pasa pa celebra dia di hende grandi proclama pa UNESCO e Fundacion a tene un celebracion masha chikito cu hobennan uni di Noord y otronan di diferente edad.

Na prome instante e muchanan no a kere cu nan por traha cu e grandinan. E cos a bay asina bon caminda e hobennan tabata balia caha di orgel cu e hobennan y e grandinan reggueton cu e hobennan.

Dia 10 di October nan lo tin un celebracion un biaha mas. Durante e celebracion aki lo tin diferente artista cu cantica, poema etc. Esaki lo tuma lugar na Renaissance. Fundacion Edad No Ta Conta lo pone un misa tambe unda mgr Luis Secco lo tey pa e misa solemne aki.

Nan tin 16 grupo social existente cu nan a invita. Ya caba por busca carchi tambe.

Un persona cu kier afilia como miembro na Fundacion Edad No Ta Conta por haci esaki gratuitamente.

Mena Schwengle durante e conferencia a señala cu nan tin diferente meta entre otro traha cu hoben pa pasa e conocimiento di e grandi pa e hoben. Tambe siña e hoben pa ta respetuoso cerca e grandinan. Tin hopi grandi cu ta den un soledad.

E hendenan aki lo keda contento pa haya un bishita y scucha nan un rato. Tin tambe diferente aspecto social unda e Fundacion Edad No Ta Conta ta tene cuenta cune.

Durante e santo sacrificio di misa diadomingo lo reconoce algun grandi. E pareha cu mas aña casa na Aruba lo haya reconocimiento y tambe e dos seńoranan cu mas edad na Aruba.